

# Pesta Buku Brunei tampilkan seni warisan Oman

Oleh : Khartini Hamir

Foto : Mohammad Hatral Hazmi Awang Abdul Hamid

**BERAKAS**, Isnin, 25 Februari. - Penyelenggaraan Pesta Buku Brunei (PBB) merupakan salah satu acara pengisian bagi menggemakan Sambutan Ulang Tahun Hari Kebangsaan Negara Brunei Darussalam Ke-35, Tahun 2019 dan juga disempenakan dengan pengisytiharan Bandar Seri Begawan sebagai Ibu Negara Ketamadunan Islam bagi Rantau Asia Tahun 2019.

Bandar Seri Begawan dipilih sebagai Ibu Negara Ketamadunan Islam bagi Rantau Asia Tahun 2019 di bawah inisiatif Pertubuhan Pendidikan, Saintifik dan Kebudayaan Islam (ISESCO).

Perkara itu antara yang dinyatakan oleh Setiausaha Tetap Kementerian Kebudayaan, Belia dan Sukan (KKBS), Datin Paduka Dr. Hajah Norlila binti Dato Paduka Haji Abdul Jalil pada Sidang Media PBB 2019 yang diadakan di Bilik Laila Muafakat, Dewan Bahasa dan Pustaka (DBP), di sini.

Juga hadir sama pada Sidang Media berkenaan, Media Specialist at the External Media Department, Ministry of Information, The Sultanate of Oman, Ms. Tahira Mohamed Amin al Zadjali.

Menurut Datin Paduka Dr. Hajah Norlila, PBB kali ini menampilkan sesuatu yang istimewa iaitu penyertaan Kesultanan Oman sebagai 'Country of Honour' bagi

meraikan 15 tahun hubungan kerjasama Brunei Darussalam dengan Kesultanan Oman dalam bidang kesenian dan kebudayaan di antara KKBS dan Kementerian Kesenian dan Warisan Kesultanan Oman.

Penyertaan Kesultanan Oman sebagai Country of Honour juga disejajarkan dengan pengiktirafan BSB sebagai Ibu Negara Ketamadunan Islam bagi Rantau Asia Tahun 2019 di bawah inisiatif ISESCO.

Sehubungan dengan itu, tambahnya lagi sebanyak lapan buah booth telah diperuntukkan khusus bagi Kesultanan Oman dalam PBB kali ini bagi pihak mereka mempamerkan kebudayaan dan kesenian Kesultanan Oman.

Kesultanan Oman juga akan mengadakan live cooking bagi pembuatan halwa di luar Stadium Tertutup, di samping wakil delegasi dari Kesultanan Oman akan mengadakan persembahan Qud (sejenis muzik tradisional Kesultanan Oman), bengkel Seni Berinai Henna dan Bengkel Kaligrafi.

"Untuk PBB 2019, KKBS melalui DBP selaku penganjur menetapkan satu KPI iaitu, KPI Sasaran Pengunjung berjumlah 70,000 orang," terang Datin Paduka Dr. Hajah Norlila lagi.

Oleh yang demikian, KKBS

berharap masyarakat dan penduduk di negara ini serta para pelajar dan penuntut di keempat-empat daerah untuk datang beramai-ramai berkunjung ke PBB yang akan diadakan di Stadium Tertutup, Kompleks Sukan Negara Hassanal Bolkhiah bermula 27 Februari hingga 5 Mac 2019.

Manakala Majlis Perasmian PBB 2019 akan diadakan pada Rabu, 27 Februari 2019 di Pentas Utama PBB yang akan dirasmikan oleh Yang Berhormat Menteri Kebudayaan, Belia dan Sukan.

Sebanyak 61 buah petak gerai disediakan yang mana penyertaannya adalah terdiri dari DBP sendiri selaku penganjur, penerbit buku kerajaan, penerbit buku swasta, took-toko buku dari dalam dan juga luar negara khususnya dari Singapura, Indonesia, Malaysia, Kesultanan Oman dan Jordan.

Pada penganjuran pesta buku tahun ini, DBP telah menerbitkan sebanyak 32 buah judul buku yang akan dilancarkan, empat buah buku bagi Kategori Ilmiah, enam buah buku Kategori Umum, 13 buah buku sastera dewasa dan sembilan buah buku Kategori Sastera Kanak-Kanak.

Pelancaran buku ini juga termasuk Coffee Table Book 'Bandar Seri Begawan sebagai Ibu Negara Ketamadunan Islam bagi Rantau Asia Tahun 2019'.

Sepanjang tempoh penganjuran PBB 2019, pelbagai kegiatan pengisian juga telah dirancang yang dibukakan khusus untuk



SETIAUSAHA Tetap Kementerian Kebudayaan, Belia dan Sukan, Datin Paduka Dr. Hajah Norlila binti Dato Paduka Haji Abdul Jalil pada Sidang Media Pesta Buku Brunei 2019 yang diadakan di Bilik Laila Muafakat, Dewan Bahasa dan Pustaka.

sasaran kelompok entiti belia, dewasa dan juga kanak-kanak bahkan sasaran keluarga juga digalakkan untuk terlibat sama dalam apa jua kegiatan yang dilaksanakan.

Kegiatan-kegiatan yang akan diadakan merupakan sumbangan daripada DBP, Kesultanan Oman, Kementerian Pendidikan, GAPENA Malaysia, Universiti Islam Sultan Sharif Ali (UNISSA) Press, Akademi UF, Al-Huffaz Management, juga termasuk kegiatan-kegiatan lain seperti Bedah Karya dan Bicara Buku, Cabaran Ria Bacathon, Pertandingan Akhir Manifestasi Cerita Rakyat (CERRAK), Bengkel Penulisan Buku Cerita Kanak-Kanak, Bincang-bincang Buku Terbitan UNISSA Press, Sesi

Bersama Penulis Buku, Amazing Race, Generasi Berkarih dan Bengkel Puisi Patriotik Sempena Hari Kebangsaan Negara Brunei Darussalam.

Pada tahun ini juga beberapa kelompok entiti belia turut dilibatkan sama dalam pesta berkenaan khususnya mereka yang terbabit dalam bidang pengajaran, pembelajaran dan media, antaranya dari Al-Huffaz Management, Tarbiyah Global, Akademi UF, Darussalam Media dan penglibatan Pameran Trak Happy Harun dan rakan-rakan strategik yang akan turut mempamerkan serta mempromosi kegiatan pendidikan yang berbentuk aktiviti bergerak menggunakan platform *mobile truck*.

## Qbeats UTB anjur Projek Tahaadu Tahabbu, Bandarku Ceria



AHLI-AHLI Kelab Quranic Beats Universiti Teknologi Brunei (Qbeats UTB) semasa bergambar ramai.

Siaran Akhbar dan Foto : Universiti Teknologi Brunei

**BANDAR SERI BEGAWAN**, Selasa, 26 Februari. - Rasulullah Sallallahu Alaihi Wasallam pernah bersabda, "Tahaadu Tahabbu" dengan erti kata, "Saling memberi hadiahlah kamu, maka kamu akan saling mencintai".

Demikianlah hadis yang disandarkan bagi pelaksanaan

Projek Tahaadu Tahabbu yang diadakan oleh Kelab Quranic Beats Universiti Teknologi Brunei (Qbeats UTB) di Bandar Seri Begawan.

Dengan kerjasama Qbeats UTB dan usahawan biskut di Instagram, @thebakingmommy, sebanyak 155 biskut dan penanda

buku berisi tazkirah diberikan kepada orang ramai yang turun dan menyertai aktiviti di Bandarku Ceria.

Acara yang diadakan bersempena Sambutan Ulang Tahun Hari Kebangsaan Negara Brunei Darussalam Ke-35, Tahun 2019 tersebut menampilkan biskut-biskut yang didekorasi bertemakan logo Hari Kebangsaan tahun ini, bendera Brunei, dan slogan projek Tahaadu Tahabbu, 'Saling berbagi, saling mencintai'.

Pada acara berkenaan, pihak penganjur berkesempatan untuk memu bual orang ramai dengan mengemukakan soalan 'Mengapa mereka cinta Negara Brunei Darussalam?'

Pelbagai jawapan diterima daripada mereka, antaranya, "Saya cinta Brunei kerana negara ini penuh dengan 'kecintaan', bebas daripada segala 'ancaman'. Semoga Allah merahmati Negara Brunei Darussalam"; dan "Makanannya nyaman-nyaman, terutama nasi katok. Semoga Allah peliharakan Sultan dan negara".

Sebarang perhubungan mahupun pertanyaan, bolehlah menghubungi Timbalan Presiden Qbeats UTB, melalui talian +673 8965042 dan bagi urusan tempahan biskut, bolehlah menghubungi talian +673 8292135.

### Kursus Ibadah Haji seluruh negara bermula 1 Mac

Siaran Akhbar :  
Kementerian Hal Ehwal Ugama

**BANDAR SERI BEGAWAN**, Selasa, 26 Februari. - Jabatan Urusan Haji, Kementerian Hal Ehwal Ugama melalui Bahagian Bimbingan Haji dan Umrah akan mengadakan Kursus Ibadat Haji bagi Musim Haji Tahun 1440 Hijrah / 2019 Masihi pada setiap hari Jumaat dan Ahad sebanyak 12 sesi bermula jam 8.00 hingga 10.00 pagi secara serentak di keempat daerah, bermula 1 Mac hingga 28 April 2019M di Pusat-pusat Kursus masing-masing.

Tarikh-tarikh Kursus Ibadat Haji tersebut ialah pada 1, 3, 8, 10 Mac 2019 dan 5, 7, 12, 14, 19, 21, 26 dan 28 April 2019 di beberapa buah pusat kursus yang terpilih di seluruh negara.

Pusat-pusat Kursus Ibadat Haji tersebut ialah bagi Daerah Brunei dan Muara di Sekolah Ugama Lambak Kanan, Kampung Lambak Kanan; Sekolah Ugama Pengiran Anak Puteri Amal Umi Kalthum Al-Islam, Kampung Mulaud; Sekolah Ugama Pengiran Anak Puteri Hafizah Sururul Bolkhiah, Berakas dan di Sekolah Ugama Sungai Besar, Kampung Sungai Besar.

Di Daerah Belait akan diadakan di Sekolah Ugama Paduka Seri Begawan Sultan Omar Ali Saifuddin, Kuala Belait; dan Sekolah Ugama Pengiran Anak Puteri Rashidah Sa'adatul Bolkhiah, Pekan Seria sementara di Daerah Tutong dan Temburong masing-masing akan diadakan di Sekolah Ugama Pengiran Anak Puteri Norain dan di Sekolah Persediaan Arab Temburong.

Sehubungan itu, semua bakal-bakal jemaah haji yang terpilih untuk menunaikan Ibadat Haji Bagi Tahun 1440H / 2019M adalah dikehendaki hadir untuk mengikuti kursus-kursus ibadat haji yang telah diaturkan di pusat-pusat kursus yang telah dipilih.